



STINAPA TA INFORMA

E BAILE DI SEDUKSHON DI E FLAMINGO

E saliñanan di Slagbaai, Gotomeer i Peliké ta áreanan di importansha pa lokual ta alimentashon di e flamingonan. Pero tambe nan ta e área kaminda nan ta traha nèshi i pone webu. Promé ku e paranan kuminsá ku e akto di relashon seksual, nan ta purba di sedusí otro ku un baile. E baile di sedukshon asta tin un nòmber sientífiko. Na hulandes por ehèmpel esei ta 'baltsen'. Tantu e paranan maskulino komo esnan femenino ta partisipá den e baile aki. Di un distansha por identifiká e hòmbler i e muhé na nan estatura. E paranan maskulino ta masoméno 20 centimeter mas haltu ku esnan femenino. E baile ta kuminsá un dado momentu den e grupo ora un di e paranan ta kuminsá rèk su garganta, pa despues habri su alanan un tiki asina. E plumanan pretu di e alanan ta bon visibel e ora ei. Tambe nan ta drecha nan plumanan ku nan boka, òf nan ta dobla nan garganta patras i pone nan kabes riba nan lomba. Despues nan ta bula un pida kòrtiku. Awor nan ta sagudí nan kabes i hasi reverensha (buiging) ku nan alanan habrí un tiki. Otro parti di e baile ku ta sigui awor ta hasimentu di un zonido manera ganshi i produsí e tan konosido zonido "chogogo". Asina e parehanan ta forma. E parehanan ta alehá nan mes for di e grupo grandi ku ta bira chikitu pokopoko. Di e momento ei bai dilanti e parehanan ta keda huntu, kome huntu i drumi huntu. Kuater siman despues di a tene relashon e flamingo femenino ta pone un webu. E akto di relashon mes ta kuminsá normalmente ora ku e embra ta kana buska kuminda ku su kabes òf boka bou di awa. E hòmbler ta aserk'é di patras te ora su pechu ta dal den rabu di e embra. E momentu ei e muhé ta para i ta habri su alanan. Awor e maskulino ta bula riba e embra i ta pone su pianan bou di e alanan di e muhé. Pa tene su balanse e ta lèn patras i ta move su alanan. E muhé ta tene su kabes bou di awa hopi biaha. E inseminashon ta tuma lugá den un sorto di ekstenshon bou di e kurpa di ámbos, e asina yamá 'kloaka'. Den e kloaka tin e órganonan seksual pero tambe e salida di urina i sushi di e paranan. Asina e spèrma di e maskulino por yega na e óvulo di e muhé. Manera a bisa kaba, despues di un luna, e para muhé ta pone un solo webu. E nèshi tin forma di un obelisko ku punta plat i ta trahá di lodo i piedra chikitu. E ta masoméno 30 sèntimeter hanchu. Ora e webu krak i e yu ta bin afó e mayornan ta duna nan yu un líkido nutritivo kòrá ku nan ta saka bèk for di nan promé stoma. E yu tin pluma chikitu i shinishi so ainda. Despues di un par di siman e yu ta bai krèsh. Un par di flamingo adulto ta tira un bista, tanten ku e mayornan ta buska kuminda pa bira fuerte atrobe. E mayornan ta keda alimentá nan propio yu te ora ku ela desaroyá e filter den su boka kompletamente i e mes por kuminsá buska su kuminda.

Skirbi pa V. van Baronie, tradusi pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru